

KvK: Empresarionan contento cu Business Plaza Step Forward A keda anuncia cu KVK lo sostene ley di firma digital

DIASABRA, 17 di januari 2015, Camara di Comercio y Industria Aruba (KvK) a organisa su evento bi-anual, Business Plaza.

Presidente nobo di KvK, sra. Daphne Agius Cesareo-Lejuez, a habri e di tres edicion di Business Plaza Step Forward. Tabata un bunita coincidencia cu sra. Agius Cesareo-Lejuez ta tambe e di tres Presidente femenino di KvK.

E Presidente a papia riba e importancia di Camara di Comercio pa duna sosten n'esnan cu tin intencion pa expande y inova nan negoshi.

Sra. Agius Cesareo-Lejuez a sigui conta cu den 2015, KvK ta continua expande su servicio na empresario. Un bon noticia p'e aña aki ta cu probablemente lo introduci e ley cu ta permiti firma digital na Aruba.

Cu realisacion di e leyaki, KvK por realisa su meta di digitalisacion, unda e empresario por entrega y haya documentonan di KvK dor di d'js primi "submit".

Un otro bon noticia cu e Presidente di KvK a comparti cu e publico ta cu KvK ta haciendo un esfuerzo grandi riba tereno di training y coaching pa SMEs y alabez KvK ta trata di avanza den creacion di un fondo di inversion pa empresa chikito, e asina yama "micro-financing".

Mas den aña, KvK lo publica mas tocante e fondo aki.

E di dos presentacion tabata di NV Elmar, sponsor di Business Plaza Step Forward, kende a comparti un poco di nan filosofia nobo, cu ta pa Elmar tin un relacion mas estrecho cu tur nan clientenan. Por medio di e Business Plaza, nan ta spera di por a yega mas serca di

e empresario local pa por ofrece nan un mihor servicio, logrando cu nan ta sirbi cada un su necesidad individual.

Den e programa di mainta e empresario por a atende varios presentacion cu topiconan interesante y importante pa nan negoshi, manera un success story di re-organizacion y asina expansion di negoshi, franchising, bon maneho ta bon negoshi y e ley nobo di belasting cu ta trata "ketenaansprakelijkheid".

Manera customber, atardi tabatin workshops, cu a trata e topiconan di inovacion den negoshi; e obligacion pa deposita cuenta anual y registro di accionista na KvK.

Durante e dos pauzenan, e empresarionan presente a haya oportunidad pa network y combersa cu otro y cu e profesionalnan presente.

Di e reaccionnan recibi a resulta cu e empresarionan a keda contento cu e contenido di e Business Plaza Step Forward aki.

Camara di Comercio kier bisa danki na su sponsor NV Elmar y na tur esnan cu a yuda nos realisa un otro exitoso Business Plaza. Daniele Ferrara di Gianni's Group, Nienke ten Bruggencate di KPMG, Raymond Maduro di EQ3, Ritza Lopez-Hernandez y Cesar Angela di Hernandez Angela Accountants & Tax Consultants, Rishi Ramsoondar, business coach.

Por ultimo KvK kier bisa danki tambe na consultants di Aruba Free Zone NV y Departamento di Asunto Economico cu tabata presente pa duna informacion general. P'esnan interesa pa cuminsa cu nan negoshi, Business Plaza, Get started, ta planea pa diasabra, 4 di juli 2015. Keda pendiente!

